

TORITENY - ALAHADY faha-21 TSOTRA - TAONA D



Hisy olona avy any Atsinanana sy avy any Andrefana hipetraka hihinana eo amin'ny Fanjakan'Andriamanitra.

Ry kristianina havana, raha tamin'ny herinandro lasa isika nandinika sy nibanjina an'i Masina Maria nampakarina any an-danitra vatana sy fanahy ary any tokoa no toerana iombonantsika, olo araiky amin'ny Trinité Masina tokoa isika. Ny fampianarana androany Alahady faha-21 mandavantaona izao dia manatitrantitra fa noharian'Andriamanitra ho fianakaviana iray eto an-tany isika no fianakaviana iray any an-danitra. Ny vakiteny voalohany dia manambara amintsika fa antsoin'Andriamanitra hiverina sy hiombona aminy ny firenena rehetra ho olo araiky ao aminy na ny avy atsimo, na ny avy avaratra, na ny avy antsinanana na ny avy andrefana dia hiombona ho iray ao amin'Andriamanitra ary izay ny voninahitr'Andriamanitra. Noharian'Andriamanitra isika ho ao aminy. Ry Kristianina havana, Andriamanitra dia mikatsaka mandrakariva ny hahasoa atsika, izao anefa tsy maintsy mahay mamaly ny antsony isika, izay ny ampianarin'ny Evanjely androany raha nisy olona nanontany an'i Jesoa ; " Tompoko, moa ve dia ho vitsy ihany ny ho voavonjy ? " Nampianarin'i Jesoa fa mila mikely aina ny miditra amin'ny varavarana hety. Inona ny tian'i Jesoa ambara amin'izany mikasika ny varavarana ?

Vakiteny I : Iz. 66, 18-21

Salamo : Sal. 116

Vakiteny II : Heb. 12, 5-7. 11-13

Evanjely : Lk. 13, 22-30

Ny varavarana malalaka dia ny fampianaran'izao tontolo izao : ny fakam-panahy mahatarika atsika matetika satria moramora kokoa, tsy mitsahatra aho ny mamerimberina an'izay amintsika fa ny fampianaran'izao tontolo izao dia mena miraviravy ka mahasarika atsika fa indrindra ny

tanora ka lavo amin'ny fakam-panahy. Amin'izao Alahady faha-21 izao dia mananatra atsika i Jesoa ary izay no dikan'ny finoana izany hoe : safidy ananantsika dia tsy tany malemy anorenam-pangady

izay midika varavarana malalaka, fa tany lonaka izay midika varavarana hety, hiasan'ny fahasoavan'Andriamanitra ka hahazoantsika ny fiadanana sy fahasambarana.

Tsy ampy fotsiny ny manao hoe nanatanteraka an'izao izahay, nanao sapilé izahay, nandray kominio izahay na koa hoe vita raha jiaby izahay araka ny fitenintsika matetika, izay ny lazain'i Jesoa ambara amin'ny hoe "Ary amin'izay ianareo dia hanao hoe: 'Nihinana sy nisotro teo anatrehanao izahay, ary nampianatra teny amin'ny kianjanay. Fa hovaliany hoe: 'Lazaiko aminareo fa tsy fantatro izay niavianareo; " Izany hoe ho fantatr'i Jesoa isika raha manahaka azy satria Kristianina isika, raha tiantsika ny ho fantatr'i Jesoa amin'izay fotoana hiombonantsika ho fianakaviana iray ao aminy, antsoiny amin'izay isika ary izay ny efa nosantaran'i Masina Maria izay efa nampakarina any an-danitra satria izy dia niaina sy niombona tanteraka tao amin'i Jesoa. Kristianina isika ka izay no tian'i Jesoa ambara amin'ny fidirana varavarana hety, izay fiainan'i Jesoa no fiainantsika.

Ry Krisitianina havana tsy maintsy miezaka isika, tsy ampy ny mandray ny sakramenta rehetra fa tsy maintsy mampitraotra ny finoana sy ny fiainana andavanandro. Aoka ny fianantsika ho fiainana mpanaradia an'i Kristy, fiainana Kristianina izay manambara fa manana safidy matotra isika, izay koa midika hoe tany lonaka iasan'ny fahasoavan'Andriamanitra hahazoantsika ny hasambarana ao anatin'izay maha fianakavian'Andriamanitra izay. Io no ambaran'i Jesoa "Hisy olona avy any Atsinanana sy Andrefana, ary avy any Avaratra sy Atsimo, hipetraka hihinana eo amin'ny Fanjakan'Andriamanitra. Ary indro hisy farany izay ho voalohany, ary hisy voalohany izay ho farany "

Ny tian'i Jesoa ambara tsy hoe hazakazaka ary marina tsy maintsy manao ezaka isika fa ny tadiaviny dia isika mivelona an'izay maha zanak'Andriamanitra atsika izay, ny maha fianakavian'Andriamanitra atsika. Izay no ambaran'ny vakiteny faharoa taratasy ho an'i Hebrio "Aza adinonareo ny fananarana izay nomena anareo" Ary indraindray amin'ny maha varavarana hety azy dia misy famaizana misy sedra tsy maintsy tanterahina satria tsy mandeha hoazy ny finoana, tsy hoe tany malemy hoy isika fa tsy maintsy mamola-tena isika, tsy maintsy misy fahafoizana, izay no ambarany famaizan'ny Tompo amin'ny vakiteny faharoa io, tsy maintsy eo ny sedra isankarazany atrehintsika, hahafahantsika miditra amin'ny varavarana hety izay. Averina indray tsy hoe fijaliana no tadiavin'ny Tompo sanatria ary porofony raha manao ny vavaka ampianariny isika dia tsy manao hoe : "Omeo anay anio ny fijalianay isanandro" tsy izay no angatahintsika amin'ny varavarana hety ary izy rahateo efa nilaza tamintsika hoe : "Mankanesa aty amiko ianareo izay vesaram-pahoriana fa hanamaivana anareo aho". Ny tadiaviny dia izy ho eo anivon'ny fiainantsika, izy no ivom-pianantsika.

Ry Kristianina havana, aoka amin'izao fotoana hiomonantsika amin'ny handraisana ireo havantsika ho hamasinina pretra sy diakra, hivavaka ho azy ireo isika mba ho i Kristy tokoa ny safidim-piainany ary dia ho hita amin'ny fiainany fa olon'Andriamanitra izy ireo. Io no mahatonga ahy matetika milaza amintsika hoe aoka hivavaka ho an'ny pretra isika mba hanana pretra maro sy masina ka amin'izay mba ho afaka hitarika atsika ihany koa amin'izay maha Kristianina atsika izay.

Ry Kristianina havana aoka mba hiseho amin'ny fiainantsika tokoa ny safidintsika fa nantsoin'Andriamanitra ho fianakaviany isika, ho fianakaviana iray ao aminy.

Ry Jesoa Kristy Tompo ô, mba omeo anay tokoa ilay tampon'ny fahasoavana avy aminao dia ho tonga anisan'ny fianakavianao tokoa izahay, hiadam-pinaritra ao aminao. Ampianaro hiaraka aminao na amin'ny sarotra na amin'ny mora amin'ny fanorenana ny fanjakanao ary enga anie dieny izao izahay hiombona anjara amin'ny hasambarana maha zanak'Andriamanitra tokoa. Enga anie ny sakramenta noraisinay tsy hoe ety ivelany fotsiny fa maninteraka tokoa ny fiainanay ka hiezaka izahay mba ho lavorary sy hiombona ao aminao mandrakariva. Amen

Mompera Arseveka Mgr Benjamin Ramaroson